

1 Pita

**Te launiu kaamata Pita e taataa
Na hakataakoto hakamattua i roto
te launiu nei:**

Na tattara kaamata *1.1—1.4*

Te ora na hakattina ana *1.5—2.25*

Na tamalliki TeAtua ia ma na tamalliki Satan
3.1—3.22

Te hakamaoni ia ma na mee e ssara *4.1—4.6*

Na tiputipu te laoi *4.7—4.12*

Na mahi te laoi *5.1—5.13*

¹ Anau Pita, anau he aposol Jisas Krai.

Anau e taataa atu i na tama TeAtua ni hirihiri ennoho maseuseu pera ma ni manusiri i roto na henua Pontus, Galesia, Kapadosia, Esia ia ma Bitinia raa.

² Kootou e hirihiri ria ki tauttari te hakataakoto TeAtua Tamana, tena TeAnana Tapu Aia raa e mee kootou no ttapu ki tauttari kootou iaa Jisas Krai, tena kussorohia kootou ki matahua ma te toto Aia raa.

Na mahi TeAtua ia ma te laoi Aia ki nnoho tahi ma kootou.

Te ora hakamaaoni emoe ma taatou i te vaelani

³ Taatou ki hakammaha TeAtua te Tamana Jisas Krai TeAriki taatou raa! Maitaname te manava aroha Tamaraa e rahi roo, tena Aia ki hakaora muri Jisas Krai itaha ma te mate kikou mai taatou te ora vahao nei. Te mee nei e hakahihia manava roo i taatou ki nnoho no hakattari te ora vahao nei raa,

⁴ tena taatou kukkira tahi koi imua kitoo na hoki ellahi TeAtua etukutuku ma natama Aia raa. Tama raa etukutuku na hoki raa ite vaelani, ite kina na mee raa se lavaa te ppara no haeo, ia se lavaa te huro no llano.

⁵ Na hoki raa ni hoki kootou natama tera TeAtua erorohi ma namahi Aia raa, emee nahakattina kootou eisi ma kitoo te ora hakamaoni tera kutanattana kihakariatu kootou ite aho hakaoti raa.

⁶ Kootou kihihhia ite mee nei, niaina ma e tau roo kootou te alloha he paa saaita koi emee nahakalono llihu hakaatoa kootou nittiri raa.

⁷ Te hakataakoto nahakalono llihu raa emee ma kihuriatu kimmata ma nahakattina kootou raa ehakamaoni. Ia nagol raa hoki elavaa teseuaria, te ahi raa ehahaaitena mee raa hoki, essau pera ma nahakattina kootou emmaharoo iaruna nagol raa eme kihahaaiteria hoki kimmata ma kootou elavaa tetuummau. Tena kootou eme kitoo te hakammaha ia ma tetauareka, tena kussau kootou iaruna ite aho Jisas Krai eme kihamai raa.

⁸ Kootou elaoi Tama raa, niaina ma kootou nisekkite Tama raa, tena kootou ehakattina Tama raa, niaina ma kootou sekkite Tama raa te saaita nei. Ia tena kootou kihihhia ma te hihia e rahi roo tera taatou se illoa ma taatou ki tattara peehee,

⁹ maitaname na anana kootou raa ku too te ora hakamaoni tera emoe i roto nahakattina kootou i TeAtua raa.

¹⁰ Na profet imua raa nitattaramai ite hoki tauareka kitokonaki taatou ki ora tera TeAtua nikou iho raa, tena ki sese ma kilave laatou te tahito te tattara nei.

11 Na tama raa e hahaivi ma ki illoa ma teehee te saaita te ora hakamaoni raa e me ki tae mai, ia e me kikapuhi mai peehee. Teenei ko te saaita TeAnana Krai e taakoto i roto na tama raa e tattara mai i te vahi na hakalono llihu tera Krai e me kittiri raa, tena kioti Aia ku hamai ma na mahi Aia.

12 TeAtua e hakari ake na profet raa pera ma na hehekau laatou raa selavaa te tokonaki laatou, e meia na hehekau raa e me ki tokonaki kootou pera ma na tama raa ni tattara i te vahi na mee kootou nillono na tama ni oo atu ma na tattara raa, no tattara atu i te Rono Tauareka raa ina mahi TeAnana Tapu e hamai i te vaelani raa. Namee nei ni mee hoki na ensel raa e hihhai ki illoa.

Te ora e tapu

13 Ia tena kootou ki tanattana na hakataakoto kootou raa ki hehekau. Tanattana, tena ku hakamoe tahi na hakataakoto kootou ina hoki tera kootou e me ki too te saaita Krai e hakahura mai raa.

14 Tauttari tahi TeAtua, tena auu setiaki na mee kootou e hihhai mahi te saaita kootou ni se ki atamai raa.

15 Emeia ppena tahi na mee e ttapu e ssau pera ma TeAtua, te Tama ni kanna kootou raa e tapu.

16 Te Launiu Tapu raa e tattara ma,
 “Kootou ki ttapu, maitaname Anau e tapu.”

17 Kootou e kanna TeAtua ma Tamana te saaita kootou elotuake Aia, te Tama tera e hakatonutonu na tama hakaatoa tautari te ora te tama i te hakatonutonu hokotahi koi; ia tena hakamaha Tama raa te saaita kootou koi nnoho i te maarama nei.

18 Maitaname kootou e illoa hea nitau kootou no ttana i taha ma na tiputipu sakkino na tipuna taatou i mua raa ni tataohi mai raa. Teenaa seai ma he mee e lavaa te haeo pera ma na gol ia ma na siliva;

19 teenaa ko te toto Kraiss e sui mmaha raa. Kraiss e ssau pera ma he punua sipsip e rahi tauareka se hai saanuku.

20 TeAtua e hirihiri Tama raa i mua Aia ni pena iho te maarama nei, tena Aia e me ki hakahura mai i na aho hakaoti nei ki tokonaki kootou.

21 Tama raa e tokonaki kootou ki hakattina TeAtua. Tama raa e hakamahike Jisas i taha ma te mate, tena kikou ake na mahi hai mmahi Tama raa; ia tena na hakattina ia ma na hakataakoto kootou raa ki mmoe koi i TeAtua.

22 E mee te saaita nei kootou ku tauttari te hakamaoni raa, tena na ora kootou raa ku matahua, tena kootou ku isi te laoi hakamaoni i alaa hakattina ana, ia tena laoi hakamaoni alaa tama ma na hatumanava kootou.

23 Maitaname na tattara TeAtua e ora tera e mmoe tahi raa e hakatike kootou no mee pera ma ni tamalliki tera na maatua laatou raa e ora tahi, ia seai ma na maatua ku mmate raa.

24 Pera ma te Launiu Tapu raa e tattara mai ma, “Na tama hakaatoa e ssau pera ma na veve, tena na mee taualleka hakaatoa laatou raa e ssau pera ma ni kaute e hhomohuri.

Na veve raa e mmate, tena na kaute raa ku maoha i raro,

25 e meia na tattara TeAtua raa e mmoe tahi se isi te hakaoti.”

Teenei ko na tattara te Rono Tauareka tera alaa tama ni takutaku atu kootou raa.

2

Na tama hakamaoni TeAtua

¹ Ia tena hakattana i taha ma na mee hakaatoa e sakkino raa, tiaki te tattara malliu, ia se tattara uhiuhi, ia se manava kkere, ia se pehipihi na tattara haeo.

² Mee pera ma kootou nitamalliki vahao nei tera e hiunu tahi na vaiuu matahua TeAnana raa, maitaname kootou kaa unu na vaiuu raa, kootou e me ki hhomovave, ia e me ki too te ora hakamaoni.

³ Pera ma teLauniu Tapuraa etattara ma, "Kootou kukkite hokkootou telaoi hakamaoni TeAriki."

⁴ Oo mai i TeAriki, te Tama e ora tera na tama e hakahekeheke ma he tama vare raa, e meia TeAtua ni hirihiri Tama raa ki hakanaaniu.

⁵ Oo mai pera ma nitama e ora, tena kuhokiake kootou hokkootou kitokonaki no hakatuutuu te Hare Tapu TeAnana Tapuraa itekina kootou eme kihehekau pera ma ni maatua ettapu no hokiake ma na mahi Jisas Krai na hoki ettapu, ia e matahua raa iaa TeAtua.

⁶ Maitaname te Launiu Tapu raa e tattara ma, "Anau e hirihiri te hatu e sui mmaharoo, tena Anau e me ki hakatuu te hatu raa pera ma he pou roto Saion; tena tetama e hakatina te Tama raa e me ki se lavaa roo te napa."

⁷ Te hatu nei e sui mmaharoo ina karemata kootou na tama e hakattina raa; ia sei ma na tama se hakattina raa:

"Te hatu na tama hakatuutuu hare raa ni hakahekeheke ma e haeroa ko

te hatu e hakanaaniu roo i aruna na hatu hakaatoa.”

⁸ Tena teeraa kina i roto te Launiu Tapu e tattara ma,

“Teenei ko te hatu e me ki mee na tama ki hinahhina;

te hatu tera e me ki mee na tama ki hhina no paku i raro.”

Na tama raa e me ki hhina, maitaname laatou se hakattina na tattara e ttapu tera TeAtua e hihai ma laatou ki ppena raa.

⁹ Emeia kootou ko te kanohenua TeAtua ni hirihiri, ia ni maatua te Tuku, ia te kanohenua e tapu, ia na tama TeAtua ettino ia ma na tama TeAtua ni hirihiri ki takutaku na mee taualleka TeAtua e ppena raa. Tena Tama raa ni kanna kootou ki oo mai i taha ma te pouri raa, tena ku oo no nnoho i roto te maahina tauareka Aia raa.

¹⁰ E isi te saaita hokotahi kootou ni nnoho pera ma kootou sei ma nitama TeAtua, emeia te saaita nei kootou ku mee pera ma ni tama Aia, ia e isi te vahao hokotahi kootou ni se illoa te laoi TeAtua raa, e meia te saaita nei kootou ku too te manava aroha Tama raa.

Na tama hehekau TeAtua

¹¹ Aku taina, taatou nitama e mee pera ma nitama alaa henua, ia ni manusiri i roto te maarama nei! Auu se tauttari hea te tinotama raa e hihai, maitaname hea te tinotama raa e hihai raa e hakataukaa ma te anana.

¹² Na tiputipu kootou i na kina na tama e nnoho pouri raa ki taualleka roo, e mee te saaita na tama raa e hai atu kootou ma ni tama sakkino raa, na tama raa e me ki illoa hokolaatou

na mee taualleka kootou ni ppena raa, tena laatou e me ki hakammaha TeAtua i te Aho Tama raa e hamai raa.

¹³ Ite vahi ki hakammaha TeAriki, kootou ki hakallono na tama tera e hakamattua i roto te maarama nei raa: te tuku hakamaatua i Rom tera e hakamaatua raa,

¹⁴ tena na pare tuku aia ni hirihiri ki kou ake na hakalono lihu na tama e ppena na mee haeo raa, tena ku hakammaha na tama taualleka raa.

¹⁵ Maitaname TeAtua e hihai ma kootou ki hakaoti na tattara na tama se atamai e tattara i kootou raa, tena ku hakaoti na tattara nei i na tiputipu taualleka kootou e ppena raa.

¹⁶ Nnoho pera ma ni tama e ttana, ia auu se mee ma kootou e ttana kippena na mee sakkino, e meia nnoho pera ma ni tama hehekau TeAtua.

¹⁷ Hakammaha na tama hakaatoa, ia laoi alaa hakattina ana, ia hakammaha TeAtua, tena ku hakammaha te tuku hakamaatua i Rom raa.

Na tattara na hakalono lihu Krais

¹⁸ Kootou na tama hehekau, hakallono na tama hakamattua kootou raa, tena ku hakammaha na tama raa, ia se mee ma kootou ki hakammaha koi na tama hakamattua e taualleka ia ma na tama pasemmu raa, e meia hakammaha hoki na tama hakamattua haeo raa.

¹⁹ Te mee nei TeAtua e me ki hakatapu kootou kame kootou e hakavaratoa i te lihu na hakalono lihu se tau te tae atu raa, e mee te hihhai kootou ki tauttari TeAtua raa.

²⁰ Kaa he tauareka peehee kootou e me ki too te saaita kootou e taai a ria e mee na mee e ssara kootou ni ppena raa? Emeia kame kootou

e varatoa te nnoho ma na hakalono llihu te saaita kootou e ppena na mee e ttonu, tena TeAtua e me ki hakatapu kootou.

²¹ Teenei te hakataakoto TeAtua nikanna kootou raa emee Krai ni hakalono llihu ma kootou, tena kimee kootou pera ma heata na tama eme kimatamata, tena kootou eme ki tauttari na tapuvae Aia.

²² Tama raa se isi na hai sara e ppena, ia se isi te tama e rono ma Tama raa e isi na tattara malliu ni hhopo i te maihu Aia.

²³ Te saaita na tama raa e haru na haeo Aia, Tama raa se lavaa te haru muri na haeo na tama raa; te saaita Aia ni hakalono llihu, Tama raa se hakamataku ake na tama raa, e meia te hakataakoto Aia emoe tahi koi i TeAtua te Tama e tonu roo i te hakatonutonu raa.

²⁴ Krai Hokoia e amo na hai sara taatou raa i roto te tinotama Aia raa no mate i aruna te kros ma kitaa mate na tiputipu sakkino taatou raa kinnoho taatou na ora ettonu. Na saanuku Aia raa e tokonaki kootou na tama lavvea raa no taualleka.

²⁵ Kootou nissau pera ma nisipsip ellano, e meia te saaita nei kootou ku vakkai muri no tauttari te Tama e rorohi na anana kootou raa.

3

Na hhine ia ma na taanata hai avvana

¹ Ia e ssau hoki, kootou na hhine hai avana raa ki hakallono na taanata kootou raa, maitaname kame nitaanata se hakattina na tattara TeAtua raa, tena hea kootou e me kippena raa e me ki tokonaki na taanata raa ki hakattina. Kootou se lavaa hoki te mee ni tattara,

² maitaname na tama raa e me kikkite pera na ora kootou raa e ttonu, ia e hakamaoni.

³ Kootou setau te hakahaka na tinotama kootou raa ki tiputipulaoi; na mee pera ma kissiri hakaraoi na rouru kootou raa ia ma na mee kivakiva kootou e hakamaumau raa ia ma na hekau kootou e uruuru raa.

⁴ Emeia te hakamaoni i roto kootou raa e tau roo te huri ake na tiputipulaoi na tinotama kootou raa, te tiputipulaoi ia ma telaumarie seisi te hakaoti, teenaa ko na mee roo TeAtua e hakammaha hai mahi raa.

⁵ Na tiputipu na hhine e ttapu i mua raa e taualleka hoki. Na tama raa e hakamoe tahi na hakataakoto laatou raa i TeAtua, ia e hakallono na taanata laatou raa.

⁶ Sara e mee pera hoki; tama raa e hakarono roo Abraham, tena ki kanna tama raa ma he tama hakamaatua aia. Kootou e me ki mee pera ma nitamalliki hhine aia kame kootou semattaku inamee hakaatoa, tena kuppna na mee e ttonu.

⁷ Kootou nataanata haiavana raa ki mee peeraa hoki, kootou kinnoho ma na hhine kootou raa ma na hakataakoto taualleka pera ma na hhine raa seivi pera ma nataanata. Hakammaha roo hakaraoi na tama raa, maitaname na tama raa e me ki hakapaa ma kootou no too na hoki TeAtua i te vahi te ora raa. Kootou kippena na mee nei ki se hai mee sakkino e ppui vaa mua na lotu kootou raa.

Na hakalono llihu na tama e ppena na mee e ttonu

⁸ Ki hakaotioti: kootou hakaatoa ki isi na tiputipu ia ma na hakataakoto e hakanatahi;

laoi te tama ma te tama, tena ku hai taina laoi, tena ku noho hakaraoi kootou hokkotou.

⁹ Auu se sui muri ake te haeo teeraa tama e ppena i akoe raa, ia auu se tuku te haeo teeraa tama e tuku i akoe raa, e meia sui muri ake te haeo na tama e ppena i akoe raa ma te tauareka, maitaname TeAtua ni tattara hakamaoni atu ma Aia e me ki kou atu te tauareka te saaita Aia ni kanna kootou raa.

¹⁰ Essau pera ma te Launiu Tapu raa e tattara ma,

“Kame kootou e hihhai ki noho te ora tauareka, tena kootou ki hihhai hoki ki krite te tauareka, tena kootou ki hakaoti te tattara haeo, ia hakaoti hoki te tattara malliu.

¹¹ Kootou ki ttike i taha ma na mee sakkino raa, tena ku ppena na mee taualleka;

kootou ki hai na mahi kootou ki too te noho laoi.

¹² Maitaname TeAriki e rorohi laoi na tama ettonu raa, tena e hakarono hoki na lotu na tama raa;

e meia Aia e me ki sekkira ake na lotu na tama e ppena na mee sakkino raa.”

¹³ Koai te tama e me ki mee hakahaeo kootou te saaita kootou e hihhai ki ppena na mee taualleka?

¹⁴ Ia niaina kame kootou e hakalono llihu e mee kootou e ppena na mee ettonu, tena kootou ki hihhia! Auu se mattaku he tama peehee, ia auu se mamannatu tammaki.

¹⁵ Emeia lotu ake Krai i roto na hatumanava kootou, tena ku hakammaha Aia pera ma ko TeAriki. Kootou kitanattana tahi, ia ki sui muri ake na vahiri na tama e vahiri atu

kootou ma ki hakari ake na hakataakoto hakaatoa kootou eisi i roto kootou ma ki nohottari kootou hea koi hamai raa,

¹⁶ e meia kootou ki hakammaha na tama raa no tattara hakatauareka ake. Tallaki na kapuroro kootou raa ki matahua e mee te saaita kootou e me ki haru haeoria, tena na tama e tattara hakasakkino na mee taualleka kootou na tama e tauttari Krai raa e ppena raa ku nnapa hokolaatou i na mee laaou ni ppehi raa.

¹⁷ Emeia kame teenaa he hihai TeAtua ma kootou ki hakalono llihu, tena kootou ki ppena koi na mee taualleka, ia se ppena na mee haeo.

¹⁸ Maitaname Krai ni mate te vahao hokotahi koi ma na haisara taatou hakaatoa. Aia e tauareka roo no tokonaki na tama haisara raa ma ki hakataki ake kootou iaa TeAtua. Te tinotama Aia raa e taiaria no mate, e meia Aia e hakaoria i te vahi te anana,

¹⁹ tena i na mahi TeAnana Tapu, Krai e haere no takutaku ake na anana tera e noho i te kina te mate raa.

²⁰ Te nei ko na anana na tama tera se hihai ki tauttari TeAtua te saaita Aia ni noho no hakattari hakaraoi te saaita Noa ni penapena te vaka aia raa. Na tama i roto te vaka raa e moisi koi, teeraa e varu koi na tama, ia na tama raa hakaatoa se hai tama ni mate i te tai u raa,

²¹ tena te tai u raa e huri mai te tiputipu te hakoukou tapu tera e tokonaki tammaki na tama te saaita nei raa ki ora. Te mee nei e kee ma te ssoro akoe na kkere te tinotama akoe raa, e meia te mee nei e hamai te hakataakoto tauareka TeAtua ni hakamoe mai raa. Na mahi te ora muri Jisas Krai raa e tokonaki akoe ki ora.

²² Jisas Krai ni haere i te vaelani no noho i te vahi

laaua TeAtua, Tama raa ku hakamaatua i aruna na ensel ia ma na tama hakamattua ite vaelani ia ma na mahi hakaatoa.

4

Na ora vahaonei

¹ E mee Krai e hakalono llihu i te tinotama Aia, tena kootou hoki ki hahai i hokkootou ki iui, tautari te hakataakoto Aia ni isi raa; maitaname te tama e hakalono llihu ma te tinotama aia raa ku se hukui ma na hai sara.

² Tena kaamata te saaita nei, kootou ki tiaki TeAtua kippena hea Aia e hihai i roto na ora kootou ite maarama nei raa, ia auu setiaki na mee tera te tinotama raa e hihai raa ki hakattaki kootou.

³ Kootou na saaita tammaki kullaka raa e ppena hea na tama e nnoho pouri raa e hihai kippena raa. Kootou e nnoho na ora haeo ma na hhine, ia kootou e hihai roo kippena na tiputipu settonu, kootou e hihai ki unu tahi, kootou e hihai ki hukui i roto na tahao sakkino, tena kootou e hihai kioo ina kai e llahi na tama e unu raa, tena kootou e hihai ki hakamarumaruru na hatu tipua haeo raa.

⁴ Tena te saaita nei na tama e nnoho pouri raa ku mahharo e mee kootou ku se hukui ma laatou i na ora haeo kootou ni nnoho mai i mua raa, tena na tama raa ku haru na haeo kootou.

⁵ Emeia na tama raa eme ki hakari ake na tiputipu laatou hokolaatou raa iaa TeAtua. Tama raa ku tanattana ki hakatonutonu na tama e ora ia ma na tama ku mmate raa.

⁶ Tera hea na tama raa nitakutaku hoki te Rono Tauareka raa i na tama ku mate raa; teena ko na tama na tiputipu laatou e isi

i te maarama nei raa ku oti te hakatonutonuria, e ssau koi pera ma na tama hakaatoa. Te Rono Tauareka raa nitakutakuria ake i te kautana na tama kummate raa ma ki tokonakiria na anana na tama raa kinnoho pera ma TeAtua e ora raa.

Lollohi hakatauareka na hoki TeAtua raa

⁷ Te hakaotioti namee hakaatoa kutaapiri. Kootou kisse manava haeo, tena kutanattana tahi, ia kootou kilavaa hoki te lotu.

⁸ Te mee hakamaatuaro o iaruna namee hakaatoa, kootou kilaoi hakamaoniroo alaa tama, maitaname telaoiraa e uhi tammaki na haisara.

⁹ Tallaki na totoka kootou raa ki tokonaki alaa tama, tena auu se tamumu.

¹⁰ Kootou hakaatoa kimee pera ma nitama e lollohi hakatauareka na hoki TeAtua raa, tena kootou e tau te tokonaki ki taualleka alaa tama ma na hoki taualleka TeAtua e kou atu raa.

¹¹ Na tama e takutakuraa e tau te takutaku na tattara TeAtua raa; na tama e hehekauraa e tau te hehekau ma na mahi TeAtua ni kou ake laatou ina mahi Jisas Krai i roto namee nei hakaatoa raa; taatou e me ki hakammaha ake i TeAtua, te Tama tera ettino namee taualleka ia ma na mahi haimmahi na vahao hakaatoa raa. Amen.

Hakalono llihu pera ma ni tama te lotu

¹² Aku soa lairoo, auu se oho ina hakalono llihu haeo e me ki hahaaite kootou peeraa ma namee nikapihi atu kootou raa ni mee kootou no sekkite i mua raa.

¹³ Ia tena kootou ki hihhia, maitaname kootou kutoo hoki na hakalono llihu Krai raa, tena

kootou e me ki hihhia roo te saaita kootou e kkite na mahi Aia raa.

¹⁴ Kootou na tama tera e haru haeoria raa ki hihhia, maitaname kootou nitama tauttari Krai: te mee nei e huri mai pera ma TeAnana hai mahi raa ko TeAnana Tapu TeAtua tera e moe i roto kootou raa.

¹⁵ Kootou kiseai ma nitaatama, ia nitama e kailallao, ia ni tama e tahhao haeo ia ma ni tama ettuu honihoni ina sara alaa tama kiselavaa kootou te too na hakalono llihu i na mee nei.

¹⁶ Emeia, kame kootou e hakalono llihu e mee kootou nitama etauttari Krai, tena kootou ki se nnapa, e meia kootou ki hakammaha TeAtua e mee te inoa Krai raa ku mmau i roto kootou.

¹⁷ Te saaita nei ku tae mai ki kaamata te hakatonutonu, tena na tamalliki TeAtua raa ko na tama kaamata e me ki hakatonutonuria. Kame te hakatonutonu nei e kaamata itaatou, tena kaa na tama se hakattina te Rono Tauareka TeAtua raa e me ki hakalono llihu roo peehee?

¹⁸ Pera ma te Launiu Tapu raa e tattara ma, “Na tama taualleka raa e me ki ttiri na tapahara i mua laatou e too te ora e ora tahi; kaa he mee peehee e me ki kapihi ake i na tama hai ssara raa?”

¹⁹ Ia tena na tama tera e hakalono llihu e mee TeAtua e hihai ma laatou ki hakalono llihu raa e tau te hakattina hakamaoni i te Tama ni pena mai laatou raa, e mee na mee taualleka laatou ni ppena raa, maitaname TeAtua e maanatu tahi na tattara Aia ni hakamoe raa.

5

Na hakattina ana TeAtua

¹ Anau hokonnau he tama hakamaatua, tena anau e kainno atu na tama hakamattua i na hare lotu kootou raa. Anau e kite karemata roo na hakalono llihu Krai raa, tena anau e me ki too hoki na mahi Aia e me ki hakari mai raa. Anau e kainno atu i kootou

² kilollohi hakaraoi na hakattina ana TeAtua e kou atu kootou raa, tena kootou kikanauhie te lollohi na tama raa pera ma TeAtua e hihai raa, ia auu se kkaro. Ppena na hehekau kootou raa, tena auu se mannatu tesui, e meia kootou ki hihai hakamaoni ki tokonaki.

³ Auu se hahaivi ma ki mee pera ma he tama hakamaatua na tama kootou e lollohi raa, e meia kootou ki huri ake na tiputipu ki tauttari na tama raa.

⁴ Tena te saaita te Tama Rorohi Hakamaatua raa e hamai raa, kootou e me ki too na hau hakananniu se lavaa te mmae raa.

⁵ Ia essau peeraa hoki, kootou na tautama vahaonei raa e tau te hakallono na tama mattua raa. Tena kootou hakaatoa ki too na tiputipu te pasemmu ki tokonaki alaa tama; e mee te Launiu Tapu raa e tattara ma, “TeAtua se hihai na tama hai ahu, e meia Aia e hihai na tama e pasemmu.”

⁶ Tena kootou ki nnoho pasemmu i raro na mahi TeAtua, tena Aia e me kissau kootou iaruna te saaita Aia e maanatu ma ku tonu raa.

⁷ Tiaki atu na hakataakoto emmaha kootou e isi raa i TeAtua, maitaname Tama raa e rorohi kootou.

⁸ Kootou kitanattana, tena ku hakamattonu! Satan, te tama e hakataukaa ma kootou raa e hahaere hakatike na kina hakaatoa pera ma helaion no seseen ki oho atu no kai

he tama. ⁹ Tuu mmau i na hakattina kootou raa, tena kootou selavaa te hakallono te tama naa, maitaname kootou e illoa pera ma na hakattina ana i roto te maarama nei raa e ttiri na hakalono llihu peenei hoki.

¹⁰ Ia imuri kootou e me ki hakalono llihu paa saita koi, tena TeAtua te Tama na mee hakaatoa etauallekaraa e me kikannaatu kootou ki ooake no hukui hakaatoa ma Krai i roto na mahi Aia tera se isi te hakaoti raa. Krai Hokoia e me ki mee kootou ki ttuu mmau, ia ki ivi, tena kootou e me ki selavaa te naue.

¹¹ TeAtua ki hakamaatua na vahao hakaatoa! Amen.

Na tattara hakaoti

¹² Sailas, te tama anau ekanna ma he tama hakamaoni telotura e tokonaki anau ki taataa atu telauniu e popoto nei. Anau e hihai ki tattara hakapurupuru atu i kootou, tena kutattara atu te iroa anau pera ma na mahi TeAtua raa e hakamaoni. Tena kootou ki ttuu mmau i roto na mahi raa.

¹³ Te hakahoa hoki telotuna e tuu i Babilon tera TeAtua ni hirihiri raa e kou atu na tattara hihia laatou raa i kootou, tena Mak hoki te tama ku mee pera ma he tama anau raa e kou atu hoki na tattara hihia aia.

¹⁴ Haere lulluu na rima kootou ma alaa hakattina ana ma telaoi TeAtua.

Te noholaoi kinnoho ma kootou hakaatoa na tama e hukui ma Krai raa.

Nukumanu
The New Testament in the Nukumanu language of
Papua New Guinea
Nupela Testamen long tokples Nukumanu long
Niugini

copyright © 2020 Wycliffe Bible Translators, Inc.

Language: Nukumanu

Contributor: Wycliffe Bible Translators, Inc.

All rights reserved.

2023-03-22

PDF generated using Haiola and XeLaTeX on 18 Apr 2025 from source
files dated 22 Mar 2023

54439682-f8e2-586d-98e1-295d02f74287